

Schmudo Willisau (23. Februar 2017)

Guete Morge

Wi au Johr am Schmudo hets widermou gheisse 3.30 schminke u das bitte pünktlich. Das heimer das Johr rächt guet häre übercho und sogar d Seline womer eigentlich nid mitere grächnet heit isch zum Schminke cho, „Go de uf di haubi 10ni geschminkt go schafe“, het si grinsend gemint. O üses Geburtstagsching isch idrudlet, Happy Birthday Haspi!!!!

Dank der feine Züpfe vom Möneli simer de aui geschminkt u gschtercht richtig Huttu ufe Zug verschobe. U weme jo scho so zäme hocket chame jo ono richtig uf Haspi Geburi anstosse. So hets es Glas Café de Paris und es Happy Birthday singe gä und natürlich nid ds vergässe... Am Haspi sis nöie Haustier: Ds chline, hänzige Hündli J Lo wo d Lies ägstra füre Haspi im Basteladen usgsuecht het. Häbit sorg zuere! Wärs kaputt macht zaut zwöi Kiste Bier!



Wi immer wemer ds Willisau am Schmudo si wird nach Ankunft avemou der Kiosk gestürmt. Das Johr isch sogar e Verkäuferin ume wo nid grad hässig wird wümerse überfalle. O üse Instrumenten Anhänger isch dank em Michu und der Nina scho ds Willisau acho. Wäred däm das mir usglede hei si o d Flueh Fäger zueche gfare. Lutscharch heisi es par Urknallbölller id Luft glo, ihr Hoffnig das öber drauf inegheit und vor de 6si scho afot spile.

Aber mir hei schön brav bis zum offizielle Urknall am 6si gewartet bevor mir üse erscht Auftritt Gspiut hei. Si schono chli müed gsi aber mir hei ausgäh und när hets afe mou d traditionelle Zmorge im Café Amrein gä. Isch wi immer fein gsi und d Larissa und ig hei di Zeit bis zum nächste Auftritt no fürnes Nickerchen genützt.

Dusse isch ihr Zwischenzeit hell worde und o mir si aui scho fitter gsi womer d Instrument füre zwöit Auftritt gfasst hei. D Lüt hei super mitmacht und ds Alice chunt eifach immer wieder guet a. Isch scho toll we aui Zuschauer „Alice, Who the fuck is Alice“ zwüschine singe.

Jetzt heimer e rächt längi Pause bis zum nächste Auftritt.



Für wasme die doch nid aus cha nutze. Böffi u Co si uf Kuschelkurs gsi und üsi liebe Präsidentin het däm ganze grinsend zuegluegt. O ds Rebi isch zu üs gtosse und het de o grad e Welle Kuschn ab übercho.

Mit so viu Nöchi und Guggeunterhaltung isch der dritte Auftritt schnäu vor der Türe gsi. Instrument fasse und Aufstelle aber haut bevor mir chöi avo spile git der Dani nö der Löffel ab. Der Böffi hetne dankend agno und losgeits mitem Auftritt. O bi däm heiner wider es grosses und ufgstellt Publikum gha. So

machts no einisch meh Spass ds Spile.

Wi immer gö 20min Auftritt schnell verbi und mir verschiebe richtig Restaurant Sternen fürs ds Mittagessen. Mit so viu Auswahl uf der Karte chamesech chum entscheide. Fein isches gsi und zum Glück so viu das o d J Lo Problemlos no satt worde isch ;) Nachedme Rauchpöisli heimer de der Papi Däschter dörfe begrüessen wo üs bim Umzug d Fahne treit. O das Johr simer natürlich nid ohne spile usem Sternen. Quer dür ds ganze Restaurant verteilt heimer no eis zwöi gspilt. Guet hets dönt und d Lüt hei so Freud gha das si no Zugabe hei wöue.

Der nöchst Programmpunkt isch der Umzug also heimer üs Richtig Bahnhof aufgemacht, wo scho d Tanja bim Nummer 10ni uf üs gwartet het. Wären dem Warte het d Andrea zersch e Striptease häregleit und när no fasch der Hut verlohre, wüus so gluffet heit.

Drum no d Fuessnote füre Däschter: Es war schön aber Windisch.

Ds Dagi mit ihrne beidne Jungs isch ono derzue cho und der Jaron het üs natürlech mit sire Trompete tatkräftig unterstützt.

Womer du wi immer der halb Umzug ohni spile wider si ufeglüfe gsi, heimer de o üsi Nummer 1, der Haspi und d J Lo, wider ufglade. O ds Publikum isch immer meh worde also los geits.

Der Umzug isch super gsi! Guet hets dönt und ds Publikum het fröid gha a üs.

Danke a dere Stell o üsem Fahneträger Felix Däster!!

Leider het üs ds Rebi wider müesse verloh u mir hei üs di lengschi Wartezeit vom Tag wieder mit Guggelose und ds schöne Wetter geniesse überbrückt.

Am 5i hets de zum letschte mal Instrumente fasse gheisse. Es bari vo üs hei afe chli zerzaust usgseh nach somene läng Tag, Aber heee härestoh und siehe da aui si wieder wach gsi und hei aus gä. Es isch e super Auftritt gsi! Ds Publikum het super mitgemacht und isch einisch meh überrascht gsi wi lut sone chline Hufe cha si. Sogar wo d Lies de Hero het agseit, u scho mit böse Blicke u Kommentare gerechnet het, heimer nomou aus gä. Es isch ächt e super Auftritt gsi und d Rückmeldige vom Publikum si aui sehr überrascht und positiv usgfalle.

Müed aber glücklich simer nachedm Auftritt direkt go Verladen. D Heufti vo üs isch när direkt heizue und o d J Lo het nachedme erlebnisreiche Tag mit der Nina hei dörfe. Der Haspi isch de mit de angere nomou go uf si Geburi astosse.

Aus i auem isches widermou e super Tag gsi u es isch eifach immer wieder geil e Gaugesumpfer ds si!

